

古蹟(故都)

河遠通志稿卷十
第十二冊

綏遠通志稿卷十

古蹟故都

考綏遠省境自唐虞三代以來其民族沿革雖不時有更代迭興之部落然率皆牧獵遷徙不營宮室至於國都首善之建置遺留則尤亘千百年而不可必得也降逮戰國始有義渠之戎建城郭之國於河南地此殆綏境初有都邑之見端歟厥後匈奴拓拔赫連諸氏皆嘗建國於斯土其故都遺蹟雖不盡存而當年經營締造之大概今亦尚有可稽者爰為掇拾畧述如左庶以備考古者之覽觀焉

義渠戎王故都

史記匈奴列傳趙有代勾注之北魏有河西上郡以與戎界邊其後義渠之戎築城郭以自守而秦稍蠶食至於惠王遂

拔義渠二十五城。秦昭王時，義渠戎王與宣太后亂，有二子。宣太后詐而殺義渠戎王於甘泉，遂起兵伐殘義渠。於是秦有隴西北地上郡，築長城以拒胡。

案秦時河西北地上郡等地，即今河套鄂爾多斯部之東西南三方邊境也。秦必俟伐殘義渠而始有北地上郡之地，則義渠戎王之國都必在今河套境內無疑。又考秦之長城塞在河套北部，亦可知此地為義渠與匈奴當年接壤處。就史事及地形推之，則漢置之朔方郡，蓋即戰國時義渠戎國之中心地也。

前漢匈奴故都單于庭

史記匈奴列傳：匈奴逐水草移徙，而左右賢王、左右谷蠡王最為大國。歲正月，諸長小會單于庭祠。五月大會龍城。秋，馬

肥大會蹕林。又曰：匈奴諸左方王將居東方，直上谷以往者。東接穢貉、朝鮮，右方王將居西方，直上郡，以西接月氏、氐、羗。而單于之庭，直代雲中。索隱云：案謂匈奴所都處為庭。正義曰：雲中故城，趙雲中城，秦雲中郡，在勝州榆林縣東北四十里。言匈奴之南，直當代雲中也。

案前漢書地理志：北出石門障，又西北得頭曼城。考史記前漢書皆謂冒頓單于之父號頭曼單于。此城既與單于同名，意者冒頓未得志之前，匈奴首都固在斯歟。

後漢初西平王故都

後漢書盧芳傳：芳字君期，安定三水人。詐自稱武帝曾孫劉文伯，豪傑共立芳為西平王。匈奴迎芳，欲令還漢地。建武五年入塞，都九原縣。掠有五原、朔方、雲中、定襄、雁門五郡。十二

年。芳攻雲中。久不下。其將隨昱留守九原。欲脅芳降。芳亡入匈奴。十六年。芳復入居高柳。請降。乃立芳為代王。明年冬。朝正月。自道還。與其相閔堪等相攻。連月。匈奴遣騎迎芳出塞。後十餘年卒。

案芳為西平王。都九原縣。前後歷六七年。國雖不傳。要為史志中不可湮沒之蹟。故著之。

後漢南匈奴故都單于庭

後漢書南匈奴列傳。建武二十四年春。八部大人共議立比為單于。以其大父呼韓邪嘗依漢得安。故襲其號。於是欵五原塞。願永為藩蔽。二十五年。南單于遣弟莫將兵萬餘人。擊北單于。卻地千里。南單于復遣使詣闕。奉藩稱臣。求使者監護。二十六年。漢遣中郎將段郴、副校尉王郁使南單于。立其

庭去五原西部塞八十里。冬前畔五骨都侯子復將其衆三千人歸南部。北單于使騎追擊南單于，遣兵拒之，逆戰不利。於是復詔單于徙居西河美稷。段柳、王郁留西河擁護之。南單于既居西河，亦列置諸部。王助為扞戍，使韓氏骨都侯屯北地，右賢王屯朔方，當于骨都侯屯五原，呼衍骨都侯屯雲中，郎氏骨都侯屯定襄，左南將軍屯雁門，粟籍骨都侯屯代郡，皆領部衆為郡縣，偵羅耳目。

案匈奴自後漢建武二十四年始分為南北二部。北部居陰山大漠以北，與漢隔絕，故范氏後書漢不為立傳。南部自單于比襲號建國，初居五原塞，嗣徙西河美稷，自是歷世相承，未嘗他遷。故降逮典午永嘉之亂，其後裔如劉衛辰、庫仁輩，猶有踞西河以僭名號者。考漢美稷為西河郡治。

即今河套鄂爾多斯左翼前旗地也。

後魏拓拔氏故都一

魏書帝紀。始祖神元皇帝諱力微。三十九年遷於定襄之盛樂。昭皇帝諱祿官。始祖之子也。分國為三部。帝自以一部居東。以桓皇帝諱猗屯。統一部。居代郡之參合陂。以桓帝之弟穆皇帝諱猗盧。統一部。居定襄之盛樂。穆帝六年。城盛樂以為北都。修平城以為南都。

案後魏拓拔氏之故都。在綏境者。不僅此一處。此不過力微創業最初定都之地耳。且魏時都城名盛樂者。非一。而此城則專述定襄之盛樂。其詳可參閱定襄故城條。

後魏拓拔氏故都二

魏書帝紀。惠帝諱賀傳。桓帝之中子也。四年。以諸部人情未

悉欵順。乃築城於東木根山。徙都之。太祖道武皇帝諱珪。七年春正月。幸木根山。

方輿紀要。東木根山在大同府北。志云。五原有木根山。此山在河東。故曰東木根山。晉太寧二年。代王賀儁徙居之。魏主

宏嘗曰。遠祖世居北荒。平文皇帝始居東木根山。平文鬱律

謚也。蓋鬱律亦都此云。或謊為勿根山。晉太元十四年。後燕

慕容德等擊代叛部賀訥。追至勿根山是也。

山西通志。猗屯子賀儁徙都東木根山。在寧遠廳北。或稱勿

根山。又云。謹案顧氏說非也。鬱律乃賀儁子。先立甚得衆心。

桓帝猗屯后恐不利於其子。乃害之。而立賀儁人。情未順。始

徙都木根山。明明創築之城。非因舊也。夫害其人。據其位。避

其臣民之不順者。萬無反就其故城之理。又况鬱律紀曾無

一字及木根山乎。魏主宏言其遠祖。容有隱約不的之詞。不
得便以為確據也。考平文皇帝鬱律乃思皇帝諱弗之子。與
惠帝賀儔為同祖。昆弟。非父子也。山西通志謂鬱律乃
賀儔子。大誤。

案木根山城。蓋僅惠帝時。以人情未附。曾一度徙都之。意
在避地。非若子孫遷平城。遷洛陽之比。故自惠帝暫都之
後。即未聞有繼居者。厥後則惟巡幸時偶至其地。殆如歷
代所謂陪都別宮云爾也。

後魏拓拔氏故都三

魏書帝紀。烈皇帝諱翳槐。平文之長子也。後元年。城新盛樂
城。在故城東南十里。

案此城仍為定襄故城郭外之陪都。其名以新盛樂者。正
以對舊定襄之盛樂城言耳。然此城築成未幾。昭成帝即

遷於雲中之盛樂宮。迄於再遷平城。未嘗復返。厥後亦僅為巡幸之地。是以史籍於此甚鮮。較詳之紀述云。

後魏拓拔氏故都四

魏書帝紀。昭成皇帝諱什翼犍。平文帝鬱律之次子。烈帝翳槐之弟也。即位稱建國元年。明年夏五月。朝諸大人於參合陂。議欲定都灑源川。連日不決。乃從太后計而止。三年春。移都於雲中之盛樂宮。

案拓拔翳槐後元年。築新盛樂於故定襄之盛樂城南十里。一年而崩。昭成帝什翼犍即位於冬十一月。至三年春。僅年餘。即移都於雲中之盛樂宮。自此雲中漸盛。而定襄漸廢矣。考雲中在定襄西八十里。黃河東岸。其沿革詳雲中故城條。

後魏拓拔氏故都五

魏書帝紀。昭成帝建國四年秋九月。築盛樂城於故城南八里。五年夏五月。幸參合陂。八月。還雲中。十二年。西巡至河而還。二十二年春。帝東巡。至於桑乾川。夏四月。帝還雲中。二十五年。帝南巡。至君子津。二十六年。討高車大破之。二十七年春。車駕還雲中。二十九年。符堅遣其大司馬苻洛率衆二十萬來寇。帝率國人避於陰山之北。堅軍稍退。乃還。十二月。至雲中。旬有二日。帝崩。

案翳槐築新盛樂於定襄故城南十里。而什翼犍遷雲中。之次年。又築一新盛樂於雲中故城南八里。於是定襄及雲中二故城之南。各有一新城。且皆稱之為盛樂也。顧此四城。在後魏時。其稱謂亦微有不同。當定襄之新盛樂未

建時其舊城但稱定襄之盛樂。迨晉魏別築一城始有定
 襄新故二盛樂之分。至於雲中之盛樂則原稱盛樂宮。洎
 什翼犍更築新城始謚之為雲中之盛樂城也。厥後終什
 翼犍之世未嘗復遷。惟以是時盛樂之名太繁故魏書僅
 於建城時一著其異。嗣即簡稱之曰雲中。不再繫以盛樂
 也。觀魏書帝紀。屢書南巡。君子津。繼書還雲中。可為明證。
 蓋君子津適位於古雲中之南。而新盛樂城既與故盛樂
 宮相距密邇。故亦可以雲中二字括之。或謂水經注謂盛
 樂宮在定襄雲中二城之間。相距各四十里。什翼犍增築
 之新城似在此宮南八里。果爾則盛樂宮及新盛樂城去
 雲中尚遠。魏書帝紀何以屢書還雲中乎。况此城如在雲
 中東四十里。則津已位於西南。不當言南巡也。酈氏所注。

殆當時別一離宮歟。

夏國赫連氏故都

晉書載記赫連勃勃傳。勃勃改元為鳳翔。以叱干阿利領將作大匠。發嶺北夷夏十萬人。於朔方水北。黑水之南。營起都城。勃勃自言。朕方統一天下。君臨萬邦。可以統萬為名。阿利性尤工巧。然殘忍刻薄。乃蒸土築城。錐入一寸。即殺作者。宮殿既成。又改元真興。名其南門曰朝宋門。東門曰招魏門。西門曰服涼門。北門曰平朔門。

清一統志。夏州故城在懷遠縣西北。本漢奢延縣地。晉義熙中。赫連勃勃自稱大夏。改元鳳翔。於朔方水北。黑水之南。營起都城。自言將統一天下。君臨萬邦。可以統萬為名。後克長安。還以宮殿大成。刻石頌功德。乃名其四門曰朝宋。招魏。服

涼平朔。北魏太武始光四年。西伐赫連昌。克其城。城高十仞。
 基厚三十步。上廣十步。宮墻五仞。其堅可以礪刀斧。魏書地
 形志。夏州。赫連屈子所都。始光四年。平為統萬鎮。太和十一
 年。改置夏州。領化政郡。太和十二年。置領革融巖綠二縣。隋
 書地理志。朔方郡。後魏置夏州。後周置總管府。西魏置弘化
 郡。開皇初廢。大業初。置朔方郡。元和志。夏州即赫連勃勃都
 城。隋末為賊帥梁師都所據。貞觀二年討平之。改為夏州。其
 城土色白而牢固。有九敵樓。峻險非人力可攻。樂史太平寰
 宇記。朔方縣。後魏太平真君六年。更名巖綠縣。其子城在羅
 城東門外。本有鳳陽等三門。夷人多尚東。故東向。開有珍珠
 樓。並通天樓。皆勃勃建在城內。
 蒙古游牧記。道光二十五年。榆林府知府徐松檄懷遠縣知

縣何丙勳。確查夏統萬城故址。丙勳於是携南針紙筆。隨步
定向。從縣城外之固水西渡。出邊牆。又西渡磨姑河。又西渡
黑水河。又西渡無定河。地勢邈而高。曼陀二里許。至舊相傳
之白土城。細加相度。在懷遠縣正西九十七里。黑水河在無
定河東。距縣城五十里。與所謂城在黑水之南者不合。惟去
白土城北五十里有淖泥河。東入無定河之下流。疑淖泥河
為古黑水。其地有土城。周圍三重。俱用土築。渡無定河西行
二里許。進頭道城。又西半里許。進二道城。又西數十武。進三
道城。頭二道城內。但餘瓦礫。三道城內。南面西隅鐘樓。東隅
鼓樓。鼓樓僅存基址。堅築白土墩。高五六丈。無級可乘。鐘樓
尚堪登眺。高約十餘丈。白土築成。雞籠頂式。大廈一間。半已
圯。其半懸鐘。屋頂形迹宛然。周圍飛欄八層。插椽孔穴。歷歷

可數。尚有三四孔。餘松椽半榭。南面列土墩七。堅硬如石。似
係臺樓之基。北頭有白土坡。似係宮殿之基。北城東西兩角
亦有土墩。當即俗所謂轉角樓者。內城東西不及一里。南北
約一里有餘。土人云。每朔望昧爽時。空中輒現城闕之形。城
南無定河。自西南來。斜絡城南。轉抱東城。而東北流。丙勳徧
訊土人。僉稱此城之外。懷遠草地。別無故城基址。查縣西八
十里無定河之北。黑水之南。亦並無堪建都會地勢。疑此即
故所謂統萬城也。

案古代在綏遠省境建都諸國。大抵皆北方民族。其人情
風俗亦多以射獵游牧為生業。於是因民俗之遷移無定。
而國都亦遂不常厥居。洎乎魏晉以來。拓拔氏崛起朔漠。
數傳之後。始奄有定襄雲中之地。其首都亦即肇基於此。

厥後赫連氏繼之。營統萬於河套。自此綏境始有切確之
國都可考。然而盛樂紛歧。猶未若統萬之可以稽其概畧
焉。

隋突厥可汗故都

隋書突厥列傳。時突厥沙鉢畧可汗既為達頭所困。又東畏
契丹。遣使告急。請將部落度漠南。寄居白道川內。有詔許之。
詔晉王廣以兵援之。沙鉢畧大喜。乃立約以磧為界。沙鉢畧
死。子染干號突利可汗。突利歸朝。上嘉之。拜為意利珍豆啟
民可汗。上於朔州築大利城以居之。雍虞閭侵掠不已。遷於
河南。在夏勝二州之間。發徒掘塹數百里。東西距河。盡為啟
民畜牧之地。大業三年四月。煬帝幸榆林。啟民及義成公主
來朝行宮。帝大悅。又帝親巡雲內。泝金河而東北。幸啟民所

居。啟民仍扈從入塞。至定襄。詔令歸藩。

案沙鉢畧雖居白道川。猶無定址。至啟民始居大利城。大

利沿革見故城條。啟民居此未幾。即避雍虞閭而遷於河

套。厥後藉隋之力。蓋已復居大利矣。觀泝金河。幸所居之

文。可證也。考隋書突厥傳謂染干為沙鉢畧之子。而長孫

為是。傳

唐突厥可汗故都

舊唐書突厥傳。始畢可汗。啟民可汗子也。隋大業中。嗣位。控

弦百餘萬。高視陰山。有輕中夏之志。武德二年二月。始畢帥

兵渡河。至夏州。是月始畢卒。其弟處羅可汗嗣位。三年二月。

處羅迎隋煬帝。蕭后及齊王暕子政道。至於牙所。立政道為

隋王。居於定襄城。處羅卒。其弟頡利可汗立。初牙值五原之

北。貞觀四年正月。李靖夜襲定襄。頡利驚擾。因徙牙磧口。頡利卒。太宗於朔方之地。左置定襄都督府。右置雲中都督府。以統其部衆。後立思摩為乙彌泥孰侯。利苾可汗。賜姓李氏。率所部建牙於河北。

案突厥為射獵游牧之民族。居無常處。故在隋唐之世。雖號強大。而迄無固定不移之都。然以突厥傳前後事蹟觀之。則白道川及河南河北實為其留踞較久之地。蓋唐代陰山磧口以北有薛延陀。東有奚契丹。西有西突厥及吐蕃。皆足以限其遠徙。是以終唐之世。突厥牙帳。或在大利。或在豐勝二州之間。或值五原之北。要皆未踰今之省境。

耳。

河南河北即今河套北。部之黃河南北也。

唐末五代拓拔氏故都

宋史西夏傳。唐貞觀初。有拓拔赤辭者歸唐。太宗賜姓李。置
靜邊等州以處之。其後析居夏州者。號平夏部。唐末拓拔思
恭鎮夏州。統銀夏綏宥靜五州地。討黃巢有功。復賜李姓。思
恭卒。數傳至彝興。世為定難軍節度使。周顯德初。封西平王。
宋太祖乾德五年。彝興卒。追封夏王。傳至繼捧。太宗賜姓趙。
名保忠。至德明。宋封西平王。遼冊為大夏國王。至元昊稱帝。
國號大夏。又數傳。歷世二百五十八年。為元所取。國遂亡。夏
之境土方二萬餘里。河之內外州郡凡二十有二。而夏州為
河南九州之一。

案李吉甫元和志。夏州即勃勃所都之統萬城。自後魏孝
文帝太和十一年。改置夏州。隋唐以來。或稱夏州。或稱朔
方。其名屢易。然實一地也。詳見前赫連氏故都及故城夏

州條。又此城當隋末嘗為賊帥梁師都所據。以其倏就夷滅。故未列專條。而附誌於此。

遼末天祚帝偏安故都

遼史天祚皇帝紀。保大二年三月辛酉。上聞金師將出嶺西。遂趨白水。癸寅。聞金兵將近。乘輕騎入夾山。時天祚所有沙漠以北。西南西北路兩都招討府。諸蕃部族而已。三年三月。駐蹕於雲內州南。四年。天祚既得林牙耶律大石兵。又得陰山室韋。謨葛失兵。自謂得天助。再謀出兵。收復燕雲。大石力諫不從。遂率諸軍出夾山。取天德。東勝。寧邊。雲內等州。南下武州。遇金人。戰於奄遏。下水。復潰。走陰山。五年。至天德。後為金人所獲。

案遼之諸京。無一在綏境者。僅天祚末年。曾於此地苟延。

四五載。雖所居遷徙無常。要以駐夾山為最久。考清嘉慶重修一統志。夾山在鄂爾多斯部左翼前旗東南六十里。蒙古名和岳爾喀喇拖羅海。此雖非正都。然亦一朝皇帝駐蹕發號施令之處。憶當時縱極簡陋。亦必有城寨規模。特以末運。史文闕畧。事難覈實。姑錄之以待詳考。並以著一代存亡之蹟云。

明蒙古諸部長順義王故都

明史韃靼傳。韃靼即蒙古。故元後也。正德時。有俺答者。於小王子為從父行。雄黠喜兵。為諸部長。居豐州。築城自衛。構宮殿。墾水田。號曰板升。隆慶四年。宣大總督王崇古上言。朝廷若允俺答封貢。諸邊有數年之安。諸部行輩。俺答為尊。宜錫以王爵。給印信。帝從崇古言。詔封俺答為順義王。賜紅蟒衣。

鍍金銀印。萬歷十年春。俺答死。帝封其子黃台吉為順義王。後傳至卜失兔龍封時。國乃衰。

案順義王俺答。自與察罕分立。即統有西北內蒙諸部。故當時蒙古語稱之曰阿勒騰汗。其子曰乞慶汗。蓋彼雖受明廷王爵之封。而自其國內臣民視之。固儼然古之可汗也。就其受明封及傳國情形觀之。殆與宋代之拓拔夏同科。考順義王之板升城。萬歷間改名歸化城。其沿革詳建置門。

